

Yom Teruah (Jou fèt Twonpèt)

(Lektè 1)

Kònen twonpèt sou mòn Siyon an! Bay siyal la sou mòn ki apa pou Bondye a! Se pou tout moun nan peyi Jida a tranble, paske jou Seyè a pa lwen rive. L'ap pwoche. (**Jowèl 2 : 1**)

(Tout moun ansanm)

Seyè a pale ak Moyiz, li di l' konsa:

« Pale ak moun pèp Izrayèl yo. Men sa pou ou di yo: Premye jou setyèm mwa a va yon gwo jou repo pou nou. Jou sa a n'a kònen twonpèt pou fè moun yo chonje se jou pou yo reyini pou adore Bondye.»

Levitik 23:23-24



Tekiah

(Yon gwo bwi ...)

(Lektè 2)

« Tekiah » se son Chofa yo itilize pou kouwone Wa yo an Izrayel.

Aswè a pandan nap fè bwi sa a nou deklare Yeshua Wa dè Wa, e nou raple nou ke nou se Wa ak Rèn e ke Li se Wa sou nou.



(Tout moun ansanm)

Nou gen yon ti pitit ki fenk fèt. Bondye ban nou yon gason. Se li menm ki pral chèf nou. Y'a rele l': Bon konseye k'ap fè bèl bagay la, Bondye ki gen tout pouvwa a, Papa ki la pou tout tan an, Wa k'ap bay kè poze a! **Ezayi 9:6**

Shevarim

(3 son...)



(Lektè 3)

Shevarim vle di kase (kraze, brize) an ebre. Li enposib pou nou viv nan vi sa a san nou pa konnen moman kote nou konn santi nou brize. Ane sa a ki sot pase a, nou te fè fas ak kèk pwomès ki pat kenbe, nou menm tou nou pat kenbe kèk pwomès, kèk espwa te disparèt, kèk relasyon te kraze, kèk rèv pat reyalize... Nou te wè mond la te sanble kraze tout bagay nan anviwonman nou. Men se

pa sa sèlman, nou vyole Torah Papa nou, pafwa san nou pa konnen oubyen pandan nou byen konnen sa nap fe a. Men aswè a, pandan nap tande son Shevarim nan, nap mande pou yon sèl lòt bagay kraze. « *Ke Papa a kraze dite nan nan kè nou e pèmèt nou retounen al jwenn li konplètman.* »



(Tout moun ansanm)

Pèp la di: -Annou wè non! Ann tounen al jwenn Seyè a! Se li menm ki blese nou, se li menm ankò ki ka geri nou! Se li ki mete san nou deyò, se li ki ka mete renmèd sou malenng nou yo.

Aprè de jou, l'a ban nou lavi ankò. Sou twazyèm jou a, l'a fè nou kanpe ankò, n'a viv ankò devan je l'. **Oze 6:1-2**

Teruah

(bwi rapid e ki repete...)



(Lektè 4)

Gwo bwi rapid Teruah a se GWO ALAM nan kap rele moun nan mond la pou yo repanti e pou yo vinn jwenn Yeshua, Sali BonDye a. Pou nou menm ki fè pati fanmi BonDye, se yon rapèl pou nou rekonsakre kè nou bay Papa nou.



(Tout moun ansanm)

Foul moun sou foul moun nan Fon Jijman an! Paske jou Seyè a pa lwen rive nan Fon Jijman an. Solèy la ak lalin lan vin tou nwa. Zetwal yo pa klere nan syèl la.

Seyè a rete sou mòn Siyon, l'ap gwonde. Li rete lavil Jerizalèm, l'ap pale byen fò. Syèl la ak latè a ap tranble. Men, se Seyè a k'ap pwoteje pèp li a. Se li k'ap pran defans moun Izrayèl yo.

Jowèl 3:14-16

Tekiah Gedolah

(Yon long bwi...)



(Lektè 5)

Sa a se dènye bwi Chofa a. Se bwi ki pi long nan tout. Li dire otan ke moun kap soufle Chofa a ka kenbe souf li.

« Siw santiw twò bon, twò awogan oubyen siw gen twòp fyète (ògèy), si wap inyore soufrans pòv yo, òfelen yo ak vèv yo, tandè sa byen ! Sa ka rive se dènye fwa wap tandè bwi sa a pandan w vivan... »



(Tout moun ansanm)

Seyè a pale, li di: -Menm koulye a, tounen vin jwenn mwen ak tout kè nou! Fè jèn, kriye kont kò nou, plenn sò nou!

Se pa rad sou nou pou nou chire, se kè nou menm pou nou chire pou fè wè jan nou nan lapenn. Tounen vin jwenn Seyè a, Bondye nou an. Li gen bon kè anpil, li gen pitye pou moun. Li pa fache fasil, li p'ap janm sispann renmen nou. Li toujou pare pou padonnen nou.

Sa ki konnen? Li ka chanje lide, li ka padonnen nou. Li ka ban nou benediksyon. N'a gen grenn jaden ak diven ankò pou nou fè ofrann bay Seyè a, Bondye nou an! **(Jowèl 2 :12-14)**

(Lektè 5)

Kònen twonpèt sou mòn Siyon an! Bay lòd pou tout moun fè jèn! Mande pou tout moun reyini! Sanble pèp la. Pare tout moun pou fè sèvis. Sanble vye granmoun yo! Reyini tout timoun yo, menm timoun ki nan tete. Ata moun ki fenk marye yo, se pou yo kite kay yo vini tou.

Nan lakou ki separe gwo pòtay tanp lan ak lotèl la, se pou prèt yo, sèvitè Seyè a, pran kriye. Se pou yo di: Pitye, Seyè, pitye pou pèp ou a. Pa kite moun lòt nasyon yo pase moun pa ou yo nan betiz pou fè yo wont, pou yo ta di: Kote Bondye yo a? **(Jowèl 2:15-17)**

(Tout moun ansanm)

Aprè sa, m'a vide lespri mwen sou tout moun. Pitit gason ak pitit fi nou yo va bay mesaj m'a ba yo. Granmoun nou yo va fè rèv. Jennmoun nou yo va gen vizyon.

Wi, lè sa a, m'a vide lespri m' sou tout moun, ata sou moun k'ap travay lakay nou, fi kou gason.

M'apral fè mèvèy parèt nan syèl la ak sou latè a. Va gen san, dife ak gwo nwaj lafimen.

Solèy la pral vin tou nwa, lalin lan pral vin wouj kou san anvan jou Seyè a va rive. Aa! Se va yon gwo jou, yon jou k'ap fè moun tranble.

Lè sa a, tout moun ki va rele nan pye Seyè a va sove. Paske sou mòn Siyon ak nan lavil Jerizalèm va gen moun ki va chape, jan Seyè a te di l' la. Wi, tout moun Seyè a va chwazi, se yo ki va chape.

(Jowèl 2:28-32)

(Sonnen tout Chofa yo)

